

巢

經

巢

詩

集

集經巢詩集卷第六

遵義 鄭珍 子尹

古今詩共六十七首

繫哀四首

并序 已下壬寅

禪祭踰月欲歌先哽痛念慈蹤觸事如昨我今不
述誰復知之茲灣此居地從主人計吾生不改遷
泯滅者惟數事耳恃其與哀俱永各繫一章三年
不事吟詠詞之鄙俚不計也

桂之樹

桂之樹樹在儼宅前三株離立各合抱一株踞右獨茂

圓其後大冢京兆阡其前壁下蔣家田樂安溪水繞田
過清淺可厲無橋船年年負擔指南走次次涉此求塗
便丁酉以還食於郡八十里歲八九旋一回別母一回
送桂之樹下堊石弦度溪越陌兩不見母歸入竹兒登
簷此景何時是絕筆十月初四己亥年嗟嗟乎桂之樹
吾欲祝爾旦暮死使我茫無舊跡更可憐吾不祝爾旦
暮死使我自今撫爾長灣然桂樹止無情永念對蔥芊

雙棗樹

圓角一茆亭亭後雙棗樹幾年亭破草荒蕪舊爲阿孃
拜斗處亭下今居前十年方如棋局一畦田一朝割半

爲池沼上種綠楊中種蓮池頭不滿三弓地斗亭即向
其閒置高籬三面裏藤花花心如蜜終年翠晚涼朝露
午晴天柳陰藤蔭藕香邊有時阿母來小憇有時阿母
還流連拏拏挽挽撚平聲菅線續續抽抽紡木棉紫薤堆
袍幫婦脫黃瓜作犢與孫牽一窠王乳呼齊至五色狸
奴泥可憐當時家計誠貧薄母身雖勞母心樂似有鬼
神旌苦辛亭西六月舒梅萼而今陳跡渾不存空有破
亭畱棗根後日懸知改遷盡冷煙寒圃自晨昏

黃焦石

後園黃焦石厥癩如蝦蟆古柏覆其頂蒼苔布其窠石

脚何所有纂纂楸木瓜石縫何所有黃黃蘗香花初來
治茲圃地瘠不可鏹辛勤我母力十年擁糞渣不知鎔
幾鉏硤确化爲畚秋分摘番椒夏至區紫茄小滿拔蔥
蒜端陽斬頭麻頭上覆尺巾細意毫不差時來慙石上
汗泚慈色加拍麾小兒女亦學事作家觀之不如意復
起爲補苴舊時值堊處塵浣風與爬爾來三四年荒翳
藏蛇蠅獨撥莽中覓隕涕至日斜

苦竹林

階西牛所宮宮南丐所止其下苦竹林種自西禪寺竹
漚宜病人竹葉宜弱子竹篾宜麻刀竹皮宜履底我母

道求難人有不如已又厭此角空過者見表裏手植數十科年年顧而喜謂筍歲增大再蓄儘堪恃今日看成林吾毋長去矣

自望山堂晚歸荏灣示兩弟二首

墓門此隔不二里時去時還日幾回在日眼穿無我到而今脚破見誰來

時時鬚有一莖白倦矣似今前可知汝曹相惜好料平聲理放我墓邊閒幾時

影山書屋示莫芷升

庭芝

四壁架不倒米盡書有勢可憐字字黑古人盡爲做老

嬾無玩心時時取娛皆得失苟不存是非自無計興來
不覺盡意去且從置亦爲下酒耳焉別此中事

有感二首

一榻來青閣三霜古白田丹鉛銷削布文獻付山川服

漸爲人指刀應善自全長懷豆盧杖搔首意茫然豆盧威等

志丹陽郡事
見大業拾遺

太祝瞎無翳仲車聾有靈海澄何日見世議皺眉聽烽
火通龍國樓船斲鮒亭黃頭方選壯雞肋媿劉伶

題新昌俞秋農

汝本

先生書聲刀尺圖

秋風起哀音吹此慈竹林行行竹林下誦公懷母吟吟

聲和淚聲滴我思母心請爲舉魚歌和以子夏琴蒼天
何高高海水何深深可憐一寸心死此一塊肉身矣恐
不男男矣恐不育旣有望兒長旣長望兒讀豈要苦兒
讀投胎我貧家貧豈必讀書祖父此生涯爾勿學他兒
他兒福命佳爾勿定爺守欲飽放爾爺爾勿怨阿孃阿
孃不爾搗黃雞屋角叫今日又生子速讀去拾來飯時
吾爾飼種餘有罌底包餘有牀裏速讀去揆來全家吾
愛爾姊妹不解事惱爾讀書子速讀待筮來從我取蔬
水有蔬苦無鹽有水復無米速讀待春來飯糲先搗與
書衣看看昂兒衣看看長女大不畏爺兒大不畏孃小

時如牧豬大來如牧羊血吐千萬盆話費千萬筐爺從
前門出兒從後門去呼來折竹籤與兒記徧數爺從前
門歸呼兒聲如雷毋潛窺兒倍忿頑復憐癡夏楚有笑
容尙爪髀上灰爲捏數把汗幸赦一度咎哀哀摧肺肝
歌哽琴咽彈天耳爲我塞地鼻爲我酸苦力種來禽禽
來不能餐極意作織成成織不能穿徒枉一世心不博
一日安蠹蠹者紙堆絮絮者新阡負毋非一塗因公附
斯篇

和淵明飲酒二十首

并序

壬寅七月自郡歸倦不欲出每獨飲數盃有所觸

寄輒和陶作至十月之盡諸章俱備除去重複見
意足矣

浩然白雲去涼風吹送之明月一盃酒青天無已時淵
明何代人松菊仍在茲真襟苟會合自信直不疑清夢
未易求此語猶謹持

種豆不得豆蒿藜滿秋山生無一日樂便死何足言千
駟葬何人真可活百年堂堂亦有此明日當誰傳

使氣路旁粥何損黔敖情夸齊止如此餓死仍無名人
死非一塗人生不更生古來嗜酒輩到死得鬼驚當時
謂醉耳竟乃事事成

少志橫四海夜夢負天飛將老氣血靜少樂多所悲相
彼白項烏一朝失其依蕭條空枝上哀思暮忘歸天寒
慘將雪北風聲不衰命微運復爾身受那得違

參差五男女媚爺爭酌喧爺醉顏如花臨風反以偏念
我蓋棺時汝曹扛入山風雨一堆土有酒豈得還今日
及舌在用飲莫用言

欲哭則不敢人命真有是造物誰得爭一成遂不毀冥
心付爛醉待醒還復爾羨爾不羈人玉顏對綠綺

海內寬大極安攘盡豪英匹夫不獲醉申韓無是情誰
言止無用酒故須人傾一壺未盡酌已聽糟牀鳴此物

良足慰亦復忙一生

喘喘脫命鹿自傷五岳姿回憶向來路環身戈戟枝斑
雞角茸茸骨相何清奇萃蒿不自飽銜與尙爾爲感之
痛人腸荷擔去莫羈

終晝瞑目堊此眼不可開紛紛何爲者薄惡難爲懷鄰
翁九十餘古性老益乖提壺就之飲謂我從雀栖天畱
作厭物眾情賤如泥君何獨不弃毋乃別有諧幸聞生
之初釋我神意迷更幸作醉語複疊數十回

哀哀入籠鳥一生逐四隅人爲萬物靈亦復無出塗誰
爾牛馬哉自供名利驅可憐客中死絲毫無復餘安宅

豈不廣直負百年居

生著人路上誰能出其道展轉無奈何可憐佛與老百姓
方會想盡一朝亦僵槁枉死究何益順生豈不好眼前
一壺酒是誠無價寶我請處人中看君立物表

盃前此天日甯非古人時古人一無見虛名在文辭詫
我爾何人把盞忽在茲快爬復護痛自認了不疑形影
互贈荅咄咄久相欺人云口可飲無偶聊邀之

酒道至廣大人各造一境至哉無量人何醉復何醒嗣
宗豈無秘其妙驟難領我懷古先民夜猶枕其穎如何
嵇與呂鸞鳳對臬炳

生年三十七姤下一陰至漸老漸變剝不變者惟醉世
物獨酒真飯食亦其次好處無可名日進正爾貴萬想
患不得待得止無味

舉觴望青天萬古此大宅各入醉一場旣醒無遺跡杜
陵典春衣蕭索銅三百揮手四十萬君妃扶太白二子
骨在無我更何歎息

有客挾秘籍云是珞琖經指示媿茫昧聽久睡欲成前
知究何益既定豈得更客言識坎險可以不出庭妙術
誠可羨風雨懷雞鳴請自用法謝君相愛情

半道逢酒具恍然三代風舊畏人我欺果在所料中同

游數十年乃有此龐通賜也徒能辯更不知仲弓

天寒思地鑪石炭賤難得此日不讀書虛凍豈非惑兒
子按我側家具復逼塞自笑似周赧空名不成國一盃
且暖足清靜守元默

家貧憚遠役縣近便求仕聊謀三徑資傾身已違己何
物督郵兒折腰甚吾恥舟颺風吹衣歸去來鄉里公田
秫未收茲固不足紀有錢送酒家無卽酒可止含觴語
阿舒嬾憐爾何恃

此杖何自來崔翁言語眞八十仁江上喜我氣頗漙手
持指謂我不獨形狀新歷傳四老人如夏商周秦年皆

八九十我亦步其塵恐便旦暮死贈子存殷勤感之日
摩耒當與五老親亦似取精多光澤活以津我年近四
十老日登頭巾約去五十年當為覓替人

和淵明責子示知同

已下癸卯

咎詈非我懷駭蠢甯汝實如何好弄心不移著紙筆念
汝寡兄弟踽踽形影匹是業苟不傳於我固無術慰情
一自足奚待有子七常恐置膝恩一變爲戰栗至矣城
南詩金根究何物

五岳游侶歌送陳煥巖

體元

歸南海

聲如風霆息如虎自說生今六十五耳聾不入世人言

日拉山靈相爾汝羨君首枕五嶽詩羨君脚帶五嶽泥
十八省山看齊了笑指蓬壺請君老君言五嶽如五經
說山我亦郭子橫世無章亥止禽向欲列弟子吾不能
可惜此頭顱汗漫成老夫羅浮朱明天是我四子書童
而習之長弃去及今料理其時歟此去君眞收汗馬牂
江新碧正如瀉動我樓船五道心先君飛到羅浮下南
樓日出見海東五朝風靜玻璃鍾何物蠓蠓一蟣蝨不
值半矢天山弓富哉中原億萬鏹拱手擲向波濤中君
歸試看五色羽邇來恐化青蚨去更尋暗虎今在無終
古銜碑奈何許因君一喟暗傷神五嶽何須有外臣羅

浮他日梅花發子午山頭憶散人

懷陽洞

自道義西趨仁懷
合江路由洞出

西出關門圉路似循舌下尾闔中有懷陽洞仰人呀空
啟龍胡我行長嘯入其中貞壁肅立偉丈夫孔雀驚人
竦翎翼白虎倒噴蒼龍逋海山眞官四五下踏雲沒足
端以舒不知何者報我至嚴飾萬象先頤吾細視乃皆
石髓成矯觀中頂更絕殊小夫人乳數百道乳頭一一
仙草數萬古不受雨露恩元氣來往翠不枯半世看山
此回苦風炎道險愁僕痛因難得妙若有悟一覺壓扁
青蟾蜍夢同熨眼筍將去蒼蒼落日趨前塗

厓塹口

羣厓力美險擠天作曲尺樹從開闢青石積混沌白一
溪中蕩齧聞聲俯來黑孤雲帶去鳥飛避不留跡白日
落其內炎天起寒色陰沈疑鬼宮宛轉入暗僻來者自
天降當頂踏我幘兩心各成驚熟視始定魄盤盤透地
縫忽出井口窄覓路者誰子此眼真有力是邦平播前
恍惚難盡識一朝會平蕩茶鹽得通易山川終古來恐
究淪異域

茅苔邨

遠游臨郡裔古聚綴坡陀酒冠黔人國鹽登赤虺河迎

秋巴雨暗對岸蜀山多上水無舟到羈愁兩日過

吳公嶺

著筏吳公嶺側目吳公厓飛獅落九天脚插赤水隈奔
湍撼不動怒聲天地迴水怒石益靜萬古蒼鬼鬼蜀鹽
走貴州秦商聚茅臺牽舟至狼灘龍灘近可挨限此十
里石摩牙競羆豺兩岸辟削成自古白不苔越此三十
里馱負費其財當年吳登舉力欲運道開鑿至此厓下
下手即風雷憤極仰天死至今祠水涯談者爲歎息民
勞天實災焉知彼蒼仁正爲斯民哀三代井法廢大利
歸賈魁肥癡享厚息錦繡揮輿僮生人十而九無田可

耕栽力惡不出身令力致無階每每好身手餓僵還裸
埋試令去此險一錢誰乞哉拔彼一牛毛活我萬叟孩
天心曲調濟人苦誇薪鎚日出曉涼斲炎風吹面來聖
飽萬山頂茫茫感中懷

仁懷廳

河西三里地析置百年來黃葛家家秀青杉嶺嶺栽山
奇珍夏荔水美詫江魴到緩兼留暫無緣果腹回

至仁懷廳五日卽病幾危將取道重慶歸述懷
與樾峰平公四首

韓子就新懦秋懷悼前猛公平四年來乃遂造斯境天

文與地壤化作三洲靜豈誠天資高吾道固無幸賤子
日就嬾榛蕪滿睂井可念夙昔心一變與冰冷尋常歡
笑場無淚喉自哽丈夫各有悲妻兒那得省天也非人
謀持此送鼎鼎羨公衣上珠再拜敢堅請四十不少矣
戀此西日景

少小苦長飢讀書牧豕暇淵明拙乞食孫楚每遭罵廿
年疾中術慧頗足藉焉知屠龍就天乃不我赦雲橫
子午山哀雛叫溪夜世議日以隘側聽吁且詫以茲朽
方寸謀生到薑蔗爛稿過十種閒抵許鄭罅徑捨既不
能欲理却還罷小人哉樊須卑卑止知稼

貧薄多艱虞肌膚就消竭獨此妙明心湛若海天月十年養奇病稽古絕無說前朝驚瘡作爪黑青照骨凌晨抹額汗滿掌詫鮮血心知入死機其勢轉橫決昨宵信奇極頃刻遂痿蹙罔極孫華原麾指眾扣逆梢而順布毒身得解脫先生何篤愛於今我三活臨分指歸路謹記不敢越

顧茲劣劣身悚彼炯炯天思便早晚去愛公不忍言五年一見面見面似此偏小住知不能後會歎何年公職在守土我職在守山家國各盡分苦辛同可憐而以農較仕相殊又天淵元亮有會作秦嘉相贈篇并合在今

歲誰學忘家禪此往其飢渴庶因消病患信有杖鉏手
不分官中閒吾福行見矣歸歟收早秬

病起同山陰王介峰

介臣上舍綏陽丁右衡

世

選孝廉登城南文昌閣

崢嶸傑閣壓符關病骨凌虛膽尙豚漠漠雲開巴子國
盤盤江繞沒丁山青天一握神難越白鳥雙飛意正閒
頻作西來登覽興不因危挫露頽顏

晚步至龍王祠納涼

晚街引閒步蕭然臨碧潯漸與市聲遠乃無煩慮侵餘
映歛遠洲微風度喬林鱗鱗半江水新涼滿衣襟道士

事龍窮茗乞鄰家斟許餉兩榕栽十年見奇陰感子干
里意發我平生心何事不盡然遙遙懷古今

留別樾峰二首

半月相從榕樹陰苦將秋雨挽離襟男兒欲去直須去
那復愁乾愁滑心

安樂江平待放船溪盃莫遣負當筵明朝九繞丁山去
回首滋州何處邊

舟出合江

岸曉樹光浮晴光浩浩流掉頭迷鰓部彈指見巴州汗
漫非前計蒼茫信壯遊獨來蘇李後同路不同舟

江津

江津腴秀地喜就榜人談
白屋灘灘市青林樹樹柑
看山便柁尾徙宅欲渝南
宰樹那能捨謀生況未堪

旱

六月初雨今將七月終
祈甘無半滴種早不全空
水遠珍於米雲生化作風
東來時借問愁道故鄉同

綦江

地仍綦市舊城郭大如園
蒼艾晚來水白棉何處邨
我懷楊氏日此覩蜀山門
斜照沙灣路啼鳥語戰魂

九盤

入道平楊日何人絕九盤至今徒手過猶作絕天看壁
縫行聲突巖陰午照寒前途仍匪舊懸度想艱難度九盤東
出安穩填至松坎爲平播舊路今由界牌東南出爬孤溪至松坎新開徑也舊路逾險

酒店埡卽事

井井泉乾爭覓水田田豆落嬾收其六旬不雨渾閒事
里長催書德政碑

三坡曲三首

少年從何來飄飄上三坡一上一回老紅顏能幾何
欲識三坡路看儂紡若何轉轉復轉轉日斜棉尙多
出門止一步何處非三坡我本三坡人君甯無奈何

重經永安莊至石堠

稻疇兩岸溪百轉阿母平生此行遠
籃輿送姪我後從一步低回一腸斷
秋雨爛塗度阡陌壻鄉未到天暮色
每逢曲處便看我遠聽慈聲喚窗櫺
當時歸去自洗泥女嬃詈我冠猶兒
拋書寸步不離母隨母應到鬢掃臍
而今我鬢正如此再欲母隨不得矣
此身何以過百年茫茫哭向路旁水

書樾峰詩稿後

乾坤清氣一枝筆不落人閒得意場
官退却驚詩力進晚涼攜卷語山光

貴陽寄內四首

六年不試北風寒又歷人閒行路難
慰別漫云成仕宦出門止解望平安
沉陰累日天如合積凍迷岡歲欲闌
辛苦未旬吾已倦計程八十到春官

資身無術具衣糧貧乞燔餘亦自傷
吾道果然成石瓠人情固厭索檣郎
金釵晝拔儲歸費布屨宵縫穩去裝
持笑寒號孟東野夫妻那得不相瘡

子午山中百念悲拮据三載見林池
龐公有婦能看冢鄂女登樓等寓思
松及春頭多覓樹梅當雨水酌分枝
離家事事煩料理園壑從來出手治

菴子成羣得獨冠喜知六七勝雍端不無溺愛何堪別
欲遣從師大是難禮本文艱還得熟夢須時折亦宜寬
老懷任取旁人笑幾見成才盡膽丸

牟珠洞

輿中乍醒山猶送聿翠泉聲接清夢牟珠一窟舊聞名
斗上蒼厓抵其空向來憎看鐘乳石癡氣不入海嶽供
山洞十九此見長號佛稱神尤惑眾是中亦復不免俗
暫息勞筋固足用人跡不聞百鳥靜忽覺獨到心頗動
木石陰陰香火久焉無魑魅享供俸幽寒曲暗究何好
世詫靈栢聚一闕神仙豈必非人情似我意故喜寬縱

好事半生得惡報至今事警神鬼弄淺礮題詩記心跡
自愧不足後來重

飛雲巖

扶輿靈秀各有分貴州得此一朶雲蠻風萬古吹不化
中有元氣常氤氲造化之手信幻極四海不作雷同文
茲巖豈復涉世想雲將授削天磨斤成時莫自贊其妙
俗間巧頌徒云云經巢居士鸞鶴羣一絲不淨落世氛
紆行五日為看此所見乃過前所聞十里泉聲接幽壑
蒼蒼萬木煙繽紛買宅徑思傍雲住下視擾攘同飛蚊
犵童獠婦不雕琢歲時雞豆情殷殷

巖近佃耕者歲租外奉田主雞數隻

豆數斗日那能齷齪走塵狀過而識悔神當欣兒女催
田雞田豆人待粗了揮手一謝雲中君

車家灣登舟寄莫五

旁溝水落清見沙灣頭人語舟欲擎東山五弟憶前度
今朝此處同思家凍雪鬼鬼白勝銀天寒一老立江濤
林塘辦好却他去多少閒鷗冷笑人

舟次黔陽遇黃虎癡

本驥

於學官畱話竟日時

虎癡方喪良子

芙蓉樓下春波碧橫棹登樓呼少伯少伯無魂空有詩
入城突遇黃虎癡虎癡六十神猶王話到無兒氣悲愴

指我顏書八巨箱十五未及收都楊年來藉補魯公集

更作年譜差周詳黃夫子此事汝於金石大有功況又

集古之闕能彌縫

集古錄集古目錄
虎癡並有補本

即不飛熊慰逋翁

俎豆亦配兩文忠丈夫業成食千古作計豈與俗子同
促判俸錢買梨棗我今日劣復長道一待南歸勘君稿

江邊老叟詩

甲午騎羸宿公安老菱縛僻蘆作椽今來不復一家在
城門出入惟烏鳶戊戌馳傳經孱陵魚鰕爲穀眾網耕
今來驛徒李家口舊道斲沒無人行下馬荒塍問田叟
此邦當年翁記否道光丙戌八月秋我渡江陵趨鼎州

公安南北二百里平田若席人煙稠紅菱雙冠稻兩熟
棗赤梨甘隨事足路旁偶慙憶當時主人饌我不受貲
鞠躬但道客難得室後呱呱方洗兒一變蕭條遂如此
羨翁稼好爲翁喜太息言從辛卯來長江無年不爲災
前潦未收後已溢天意不許人力回君不見壬寅松滋
決七口閭殫爲江大波吼北風三日更不休十室登船
九翻覆老夫無船上樹末稚子衰妻復何有可憐四日
飢眼黑幸有來舟能活得他方難去守壞基田土雖多
歉人力無牛代耕還自鉏無錢買種多植蔬今春宿麥
固云好未省收前隄決無縱得豐成利能幾官吏又索

連年租租去老夫復不飽聖看此地成荒蕪君自貴州
入湖北貴州多山誠福國任爾長江漲上天不似吾人
生理窄官家歲歲程隄功而今江身與河同外高內下
潰尤易善防或未稽考工君看壁立兩丈土可敵萬雷
朝暮春洪波爲患尙未已老骨究恐埋蛟宮聽翁此語
良太苦請翁遂止莫復語太平不假腐儒術吾亦盱衡
奈何許細雨蒼茫生遠悲廿年歡悴同一時誰歟職恤
此方者試聽江邊老麥詩

卧病旅中

一黑一黃蘆幕底半明半暗紙窗前頻頻樹影成迎送

細雨沙瓶奏管絃

眾耳喜聽檐鵲語羣喧爭逐榼麟皮行人側足居人笑
老女纏頭季女飢

巢經巢詩集卷第六

巢經巢詩集卷第七

遵義 鄭 珍 子尹

古今詩共五十八首

自去年九月目漸失明及入都至不辨辟閒徑
尺字而視秒髮皆知有物奇疾也

已下甲辰

初冬記讀東原集鐙下尤能細字清自過一回盧大戴
遂爲六月左邱明傷心未老先輸眼悔昔無功苦費精
醫藥枉施仍強進著書終恐負平生

君子何所悲

濁水魚鼈肥清江風浪飛蠹蟲食嘉果荆棘無枯枝庸

子福所聚志士病所欺天道有難識此心終不移鑒井
寄達言君子何所悲

自清明入都病寒遂夜瘧至三月初七二更與
鄉人訣而氣盡三更復蘇以必與試歸始給火
牌馳驛明日仍入闕卧兩日夜繳白卷出適生
日也作六絕句

一病天涯死更生命存却復計浮名却思萬里南歸路
如此孱軀不可行

忍憶前宵九轉閒友朋哀慰僕潛潛明知死作城根土
尙囑歸埋子午山

勒驥蒼涼斲鶴哀廿年九宿試官槐擲將空卷出門去
王式從今不再來

名場遍走歷紛紛水盡山窮看白雲三十九年非到底
請今回向玉晨君

未必微生少夙脩不教鉅痛不回頭一灸醒來身世見
涼風微雨度滄洲

挽鬚問事子嬌成解抱圖書從我行歸去誓攜諸葛姊
鉏花冢下過餘生

自內城復楊梅竹斜街舊寓

竟死誰歸骨含悽白撫魂幸留長苦命生出正陽門積

砌榆錢滿依牀藥竈蹲此身天弄定形影其溫存

感春二首

都門陽春三月時生氣浩浩暄風吹驢騾蚤蝨各得遂
一士閉戶長嗟咨巨編拄眼看莫見恨恨擲去不復悲
貧賤讀書且莫許皇天作孽誰能違

人生貴立三才中有時雞狗難比同鬼神自習祝鮀後
憎愛紛紛隨世風倨影強形守鑪藥九衢盡日車隆隆
生誠無用死亦已苦縛一芥何足崇

出都

廣文賸飯足孫謀天縱南歸及麥秋看取塵頭鷹脫銳

一鞭吹影過蘆溝

桃源側黃花塢種松

微雨阻前路漫浪踏雙屐行盡桃花源不見秦人宅廬
墓得吳生與我共心跡爲種十五松安排冠蒼壁他年
龍虎吟記是老巢植

早駐鄭家驛攜稚女釣魚溪上

宿早不得卧溪山思浪游觸物巧會興屋邊見綸鈎了
角主人女導我登磯頭雨餘新漲黃稻風涼似秋即事
得神愜頓忘千里愁

書柏容存稿

身集卷一
黎生於我席硯友四十存詩三百首自言燒弄過大半
夜寒持示商可否濃塗爛改復自嫌得失已知我何有
不廢讀書真有益爾來自比少作厚知君學養再十年
定視今茲又芻狗文章萬古無底寶權此千金享做帚
細念人生殊可憐頃刻兒童謚爲妄生前百苦不稍放
死去即應骨速朽何取千秋萬歲後一句兩句在人口
我今久嬾事吟詠心偶有會苦出手性耽佳句自君僻
亦賴精神足磨揉相看鐙下兩癰仙回憶初心呼負負

子午山詩七首

并序

山舊名望山堂寶童塢嚮無居者道光辛丑墓先

妣於山中始爲廬實其名以山位正子方因名之
曰子午迄今五年寸莪尺塿漸有蔚色撫事哀命
聊述所懷

午山千步地步步傷我心昔時無寸毛今日開園林白
水繞山陽青岑擁山陰流峙所環會聖盡邛壑溪痛我
聖善母音形此沉沉居生事事記念之淚盈襟一世井
竈思終老力不任得此前十年何啻值萬金

自飲竹溪水忘作竹溪客阿母亦知我終祖竹溪側遺
言勿葬遠要長見兒息艱難卜斯邛藏妥萬載魄買山
如補衲五歲見完璧智者每嗤我無田苦買石而我正

未已在家日往役取次成林廬隨行見兆域意補未遂
志因以暖窰多變我乃不諒區區論陽宅

東徙成單家相响恃叔季詩書愧拙教生產乃能事半
世刷龜毛傾筐令分治經今四年來喜見勤不匱信知
東西宮周孔盡人意悠悠我之思日望長諸稚茲山護
牛羊豈徒終吾世賢苟在兩家於我究何異

仲也能遠謀結廬米溪尾我從萬里歸突兀喜見此園
肥易種蔬庭空待編枳蔥薤得取具一房足慰矣徐徐
乃謂我請曷同茲徙汝言良復佳吾意固已死上下一
水閒相隔不踰里妻孥能數來豈獨地下喜

巖栖非眾情豈不子孫慮迴翔墓門木終不忍言去落
地四十年強半食於寓後日事可知而何求安住生兮
依毋居死也歿毋厝山下有隙地暇時補竹樹結茅期
不廣取足蔽子婦來者勢日疏亦各慕所慕善繼甯不
懷百歲非我與

種果數十名種樹千百株果期盲且多樹祝喬而衢乞
盡四鄰栽童山漸蔭蔭時時小兒女花果薦碑跌何殊
毋在時梨栗朝羣雛人情鮮貪戀至性還相疏要令墓
不孤端恃多所圖前年復種橘今年行可區常誇廿載
後眾羨鄭家奴

遵義無橘

山妻每見笑君甯鐵龍胡笑指阡

下柑實大三寸餘一唾阿母口十年究何如

少小不讀律自闕經世務名漸爲人知非躬隱憂懼違
已求薄宦亦爲無食故誰能持飢腸林下散清步低心
暫苦勉自計良已屢欲去誰汝畱但歸要有路十畝儻
足辦吾亦何不如勞勞百年中會有貴生處未敢望前
哲終期啟童孺

贈趙曉峰

旭

鬼亦厭斯人不使犯其界放我萬里歸忽若脫天械秋
雨斲行跡閉戶養厥曠每思二三友落落隔關隘安得
一回見頓使五體快因緣至城闔曉入舊經解歡言晤

莫五道君足初屈相望咫尺閒卽欲走一介犬吠忽已
來愜逾馬摩疥蕭蕭柳邊影婉婉鐙下話歎息三年閒
次第釋苴蒯同作無母兒惡命可勝喟我已無壯志舊
學日稊稗君猶心力強挾隱發光怪九原若可作者舊
應感拜

曉峯新輯桐梓
詩畧桐莖二種

投我日來作謂當灸其瘵點摘

吾何能況又懶且憊向來有私見詩品無定派性情異
剛柔聲響遂宏喝紛紛儻忽徒乃鑿混沌壞細思究何
益風雅因之敗君才何旖旎蘭葉明沆瀣時時閒叢薄
亦要藉芟殺文字千古事荏苒日月邁安得常合并刻
覈互懲誠蕭條雨中菊落寞殘星挂明將捨君去助婦

種蔥薤衣食當須紀陶言不吾賣後會復何時值便寄
聲欬勉及身手健莫負老菁芥

臘月朔鄰翁招飲適莫五來同拉去晚歸丁吉

哉元勛復至莫五出次東坡江上值雪韻詩即

依韻作

君不見曼卿飲作牛與龜倒冠落佩不復知狂酣究覺
有何好枕藉但聞雙息吹又不見袁公逢人呼與飲道
旁對舉掀髯騷明日扣門謂偶耳人情冷極成冰斲何
如浣花先生飲田父隨風步履忘艱危聽叫開瓶索果
栗舉家忙亂如夢絲指揮豈識拾遺貴邨野何知虛禮

爲一暝一肘好顏色柴門月出還遮持此誠真飲復真
醉性命之樂淪膚肌我今忘我混談笑不論樵婦同牧
兒朝來鄰叟約過酌晴臘無事真良時釣藤酒老勝浮
玉冬青樹密常垂幃麥頭生仰黍頭俯一醉恕我低昂
姿更爲主人得佳客聖攜餘興何淋漓入門巖壑忽已
暝丁大乃復臨階墀好事偏從一朝集喜氣排暖風披
披寥落心知已無幾年來散走傷飢馳不期而會豈天
意恨子不與西家卮亦知歲殘有料理溪山數日聊相
隨夜冷寒菹佐冬釀且復三人斟酌之

明日同人過話山堂次莫五韻

河洲美人身窈窕貪者欲之致天討歡華止作滿苟得
榮悴何殊夏靡草我不惜苦正不苦事無可了亦無了
長憐曹交負粟食又歎宋人使苗槁百年失路良已多
萬事回頭當及早近喜眼從歸後得稍將心乞古人掃
茫茫泊處日向西冉冉鬚毛霜薄曉老虔誰復念樗散
莫弟偏能顧蓬葆南中學者自古難海內而今如子少
久期廬墓作近局何幸宿春聚冬杪山茹苟且笑鼎飯
宰木蕭寒話窮鳥別祖吾知此地為故塋心念先靈惱
門衰未必遷地良骨劣仍須祝天保今朝一會豈意及
回首三春可愁倒杜鵑窺京計已非士安著瘡灾尤巧

脫命但求軺傳賜旨人乃中身材考歸來痛定始自憐
笑去長飢亦堪老當時若向萬人海短命真擲千金寶
斷難此處望歸骨定向西城埋裹藁君等何年與計偕
多情一酌問吾好那能今日酒同醉更得餘情詩自繞
我聞善蛻即神仙笑指前山乃蓬島夜溪歌罷海西流
元氣為舟向空掉

正月四日邵亭東來喜賦

已下乙巳

點鐙欲飲聞犬吠小兒走報羊叔至開歲四日那即來
出看果是邵亭弟為言奉檄恐先去早知行緩尙濡滯
更遲數日終汝勞多笑幾回亦吾意漫言善化七日似

不暖不黔究何濟諸葛營前峰刺天未到夢魂已遊戲

齏鹽似蜜未可知酒肉開花判同醉

俗謂新正為酒肉開花時

人日垚灣桂花樹下聯句次韓韻

散聖京兆阡

鄭珍

林鳥變晴美融風蘇水木

莫友芝

煦

氣殺冰凍土農疲放閑

珍

飲食習奢用手禮親姻交

友

芝尾隨婿姪從精粗盡器同

珍

老小裹餘共紛吾樂消

朴

友芝

從俗有迎送依依話行李

珍

絮絮雜菱葑霞餘

孤旆飛

友芝

月度一梭縱即事期優游

珍

遠涉憐倥傯

七日古所敦

友芝

惜光倍珍重

珍

往攝古州訓導別柏容邵亭二首

月下一盃酒誦君詒我詩小別何足道因之動離思王
事不可延公家有程期細雨蠻邨路春風鐙火時能無
感行役天命良自知此官誰使然正聖好爲師此地誰
使然亦爲喜變夸

昔從程夫子落飲又魚湖邦士咸造堂雍雍雅以舒春
晚校其藝文質多相扶語我韓侍郎三月此薪芻爲日
固無幾爲化良有餘男兒但如此何云今古殊漢朝道
真公貽今貴州書盡即字其姓子豈西家夫九原愴已
矣瓠落無我如詎知試手處即是毋歛區茫茫念淵源
此事豈在余

黎大似同甫莫五如伯恭我病稍姦黠青蒿倚長松然
亦各緣性無取和而同要是老大時定命當擇從即以
文字論外形誠自中知至豈易言謂知恐私衷此意期
共勉吾聞紫陽公

雲門燈

遵義東樂安江一名斤竹溪源出綏陽
即元和郡縣志所云恭水夸牢水唐貞

觀中邢州置樂安縣播州置恭水縣皆以此
水名其水穿燈出會眉水流百餘里入延江

牢江驅白雲流入蒼龍門門高一千仞拄天氣何尊蕩
蕩百步中水石互吐吞阿房廣樂作巨竈洪牛犇餘波
噴青壁震怒不可馴睂水若處女春風吹綠裙迎門却
挽去碧入干花邨我行始兩日異境壯旅魂扶懸自何

年信有眞宰存夕陽一反射倒樹明蒼根老蝠抱石花
紅暈雙車輪仰歎山水奇俯躡造化跟想見混成日待
與見者論

南河渡

十里下南河險絕駭初見攢厓摩青空削徑截霄漢延
江萬丈底死緣凝一線仄行酸腿酥俛睨剛膽戰顧後
瞻幸過驚前呀猝轉日落西山寒孤煙上漁爨入舟忽
平坦去僻路挂面登頓衰始勞艱危老逾憚極頂得破
茨取宿不問飯竟夕枕江聲搖搖挂天半

自大容塘越嶺快至茅洞

午經大容塘瑣瑣詢老卒蹙額指前箐君去慎莫猝此
城二十里窈窈煙火絕爾來惡劫徒伺客恒出沒不論
士與官商賈更待說吹葉作號令屬至魄已奪稍難刀
刃下乞命解禪襪來如神猙獰去若鬼飄忽中坡名嶺
快昨歲增埃卒孱兵四五人汎戶晝常閉縛去觀所爲
往往負株櫛君知九股遺諸種近潛結黎平及鎮遠僻
所亂如髮大者殺過人小者盡財物事覺官恃役役遇
肝腦裂無已官自行先聲震羌威官經東山去民報西
山發形已似流賊倉卒能盡述守土節安治掄著不敢
泄大吏信其然更爲最其伐豈知貫盈勢隱隱待斧鉞

觀君睂目善所蹈必逢吉聞言久沉吟顧子悔攜挈此
曹豺狼性或遇那得脫期會詎許違變勇陟亂岳是時
天向黑氣象更慘切陰寒杉松林一翠靜兀兀下顧暗
無底上窺密無缺旋塗盤修蛇向背邈胡越兒子置我
前喜懼乘見滅怪鳥突一聲怯膽懸忽掣輿夫去默默
快若風攪雪移時見人邨相喚顏色悅却望高蒙龍知
向何處出夜寐尙屢醒乃塞苗聒平生飽艱虞此信
穿虎穴

游南泉山

黎平罕游觀南泉據其勝萬古不受赭窮荒縱靈孕松

杉皆百圍兀立高且正仰梢摩空冥俯抵絕究竟石氣
一何厚翹楚尙餘勁到來始知溪歷久愈覺靜雲裏聞
遙春風邊度疏磬屢上若無路斗轉忽見徑攀緣著精
廬清極不可更沉沉綠無際白日澹幽映門生與兒子
恍似伴陶令默坐如有云窅然見吾定

黎平木贈胡生子何

長新

遵義競墾山黎平競樹木樹木十年成墾山歲雨熟雨
熟利誠速獲飽必逢年十年亦紆圖綠林長金錢林成
一旦富僅忍十年苦耕山見石骨逢年亦約取黎人拙
常饒遵人巧常飢男兒用心處但較遵與黎我雖爲遵

人獨作樹木計子黎長於遵而知墾山斨手持不急書
未是救眉睫以我老橐駝求指經用法此法信者難庸
更望其行似子實難得所要用精力精勿拔千歲根貪取
百日稻送老墾山人汝材看合抱

寓宅牡丹盛開

山城過雨三月初春風吹出紅盤盂荒庭無人白日靜
蜂貪蝶媚紛紛趨聖教蘭蕙俯首視何況桃李漫山粗
主人近貧不收拾嘉植委置隨榮枯富貴根成造化厚
不賴人力還蘆藪朝霞肯惜惜顏色夕露更與增濃腴
飛燕凌風鳳襖顛玉環薄醉雞頭酥捲簾一看一羞歎

此花此客誠相孤居亭要得貴游子堂上百寶明氍毹
美人新妝起歌舞玉管銀簫天馬駒胡令廣文伴晨夕
傾國豈宜山澤癯昨思沽酒錢不得今來聖客瓊亦無
發言徒取紫雲賤借問苦覺青蓮汙閉門藏耻未可罪
違己獻笑真難吾何殊蕭娘對老褚未擬正叔逃名妹
向花一噓謝不敏譏評草木非區區

開泰學博余紫巖

芝

三丈期明朝爲作生日謝

不赴兼約游城東

中年觸事易生悲況復重重客裏思千里折腰辭宰木
一春歸夢在山池未乾昨日終天淚

三月初八
先妣忌日

更說明

朝墮地時莫任情深戒湯餅尋芳有興欲相隨

三月初十訪何忠誠公故宅

齊眉雙石獅相距特丈強前丈爲旗臺高廣三尺方樹
辟餘底石其修不踰常獅旁即門階才足容筍將屋址
完完存舊廬則已此外觀儉如此內構可意量地稱五
架屋想止門堂廂偪仄復偪仄且觀且太息此是有明
愍帝之巡撫忠誠何公之故宅當時此中男婦四十口
公心且無宅何有規模應在撫楚年遺築不隨明社覆
死國良獨難善家亦非易看今守令宅罕此儉約制何
況潭潭督撫第吁嗟公居止如是安得矜式千年更勿

替令人却憶許學使

樹壁前隙地民家占爲圜廁前學使許乃普命盡撤去

神魚井

并序

井在何忠誠公故宅右廣不及丈深五六尺源仄出石罅中呀然莫知其深也公母廖夫人浣井邊有大魚常從石出馴繞左右夫人甚憐之後生公時見金鯉飛入室中五色晃耀魚亦自是不見也鯨鯢羣沸海水飛思陵龍去長陵微千載神魚應時起天教出護小龍子一龍酣睡花月場春鎗未罷驪珠亾一龍癡守豬婆老翁洲雲散波濤荒最後一龍勢何及猿鶴蟲沙得收拾茫茫湘水繞空城神魚止向高皇泣

竹簾門前波卷山神魚歸壑憶當年百靈扶出大江底
九宮遺鱷還爭攀此意真成唐郭李垂頭豈料白牙市
掉尾一振全永回信知天惜神魚死長虬改穴鱸鮪隨
歎息
斷家盡米脂龍伯聖摧黃面父神魚猶喪赤心兒
李錦自成子賜名赤心慘憺春風吹故井滿目凡鱗厭投餅游人
詫說飛上天不道神魚今未瞑

遵義山蠶至黎平歌贈子何

大利天開亦因人胡六秀才名長新作文不動主司聽
作事乃與君相親當年讀我檇繭譜心知足法黎平民
自恨家無檇樹林又乏財力先椎輪逢人即講利且易

金帛滿山邛苦貧事旣少見多所怪譖復棘口難俗論
疑者自疑笑者笑生也不顧逾津津黑洞宋氏亦深計
種橡於今及三世有錢能致遵義蠶無術能行譖中事
胡生大喜得憑藉牽合遵人負種至八千蛾走一千里
上巳和風與清霽胡生媵種宋氏迓男婦爭觀奔且躡
入林下擔發荆筐茶樹杉林皆失氣羊鳴豕哭闌一邨
五牝作犒牡供祭蠶師善禱紛挂地宛廡西陵鑒誠摯
使爾繭如甕與盎使爾蠶無斑與縕使爾遵人無癘疫
教使黎人似遵義胡生此時六國蘇手執牛耳縱招呼
十年談紙一朝見不信此中天意無昨日歸來夜過語

快聽使我張鬚鬚貨惡弄地不必已衣食在人何異吾
男兒不食四海俎桐鄉豈無朱嗇夫昔我與婦論蠶事
本期博利彌黔區黎播相望幾江水豈料生能行我書
書行我到兩無意事會天定非人圖看生此舉必獲願
已說蠶花香四敷不須快擬樂公社譜到他年芻狗芻

三月廿四西佛厓拜何忠誠公墓

厓在西城邊僻下三丈森可懼根齧黃團溪墓去厓邊
無六步虎牙中含一舌土信是天埋忠骨處攜兒拜冢
下才予不忍去汾陽力盡作文山洒淚蓬科足悲慕既
無豐碑載偉烈復乏嫡裔謹看護俗書兩行鐫墓前知

是康熙庚辰年公之同宗老孫子以石砌壟標識阡今
來標廢壟亦穢漸有新鬼爭墓田二百年間令若守料
理前賢竟無有從古仁人志士墓不恃兒孫作干揆昔
年作客在衡湘五月觀祀中湘王衣冠出游壓地破一
國男女皆若狂彼都人士尙如此墳墓所在邾容荒萬
古收藏正氣地豈是牧兒芻豎場我量墓後隙地十丈
許盍埒南山粗石抵厓澣千年兵燹不能無敬是公阡
誰敢侮墓石厓勢長若睂既不與墓偈亦無他葬之上
盍一亭還一祠祠以奉春秋亭以列巨碑碑刻譜傳使
眾知又令來者得慙息可蔽風雨兼炎曦此事成來正

需幾歎息易就無人爲吾觀此邦人多富而好義卽如
比勸捐河工旬日輸以三萬計固知忠愛出習俗不愧
作公鄉子弟何況公爲國故與樂祖謀及脩阡定較易
特要順風之呼登高臂固非一二後生事我無尺寸柯
辯口空懸河作詩亦自笑迂濶邦士邦君知謂何

朱小梧

鳳翔

步月過話卽送其明日還邨

小梧
黎平

拔貢官渭源知縣告終養歸遂不出文行并有根柢著有審安堂集

壯年吟徧關外天拂衣歸來三十年龐公不肯入州府
潘令止解娛長筵福祿江頭夜醉月香雲巖畔朝看山
詞女詩孫侍左右夢魂不到黃河源我生夙尙重耆舊

桐野之外嗟才難豈知芙似一枝筆嵬嵬秀插王山邊
王山磅礴清淑氣不止發爲忠烈賢固宜有人擅文采
上與董三騰何蛟爭不刊龐睂秋客亦何有忘年已過施
轉先白鬚扶杖踏清夜敲門徑入無衣冠鐙前指我山
水絡彩江始悟黃宗義齊召南謾西傾朱圉在足下鳥鼠積
石環目前春風虛堂競覘轡何處到此飛空仙若說明
朝卽歸去我懷未盡愁悵悵終當登堂話雞黍待辦布
襪青行纏

酷熱

古州百里平四圍天冪山六月燭赤日蒸人甑中閒先

生冷官冷謂可勝以寒豈知百鍊剛亦復制炎官欲視
眼不開欲語舌已乾終朝閉戶聖獨作水月觀信有萬
古井盛夏無溫瀾聊爲酷熱吟語詭不必傳

諸生次昌黎喜侯喜至詩韻約課詩於余和之
自我來古州口抱畏人念瑟縮冰下魚有口不敢噉我
學知不華難於強同染俗情又諱疾喜拒倉鵲矻以此
遠非笑亦免取人厭豈知拘囚中竟有燭天劍求我發
其硯含鋌思一閃文字極衰敝汜濫已昏墊殷勤二三
子豈非有所驗惜吾無久居行待問歸店此意終我畱
人力果誰欠作詩誠餘事強外要中歉膏沃無暗槩根

肥有新艷懸知他日作會得老夫澹奈何苦窮冗心源
不時慙誰能絕人事逐暇當握槩朝可同脫粟夕即共
鐙燄我嬾無門興觸事多口占惟應苦諸子供我眼福
贍遐荒聊自娛一笑老佗僭

題朱烈愍公守萊圖冊

并序

公名萬年字鶴南明黎平人累官知萊州府崇禎
四年登州游擊孔有德叛自二月初三日圍萊公
百方拒之至七月初七日督師劉宇烈以僞詔撫
孔軍促公出城宣詔公與巡撫謝璉出被執罵賊
死城南門外萊人卽死處祠之歸其尸葬黎平北

門外其一臂後得萊人卽以藏塑像中祠四壁並
畫其時守禦事嘉慶乙丑公六世孫述文往省祠
萊人臨壁爲四十冊前冠公像貽之歸今年八月
其子晟奉冊乞題已無餘紙余爲大篆書署其首
卽係詩當欵識云

秀才晟也至我前出櫝敬示一巨編云是其祖守萊軍
容四十冊萊人仿之祠壁求我言我思太常公張許同
正氣大書明史傳細載稗官記此圖題者又已備我復
何能贊一字晟也懇懇不可虛我觀冊首闕署書爲檢
以篆當楬豬雖然冰斯一筆無太常察書應肯予焉知

畱此非我頤晟也藏去慎勿疏乃祖守萊州身死城不失汝今守斯圖當視乃祖守萊日吁嗟我愛忠孝固此說鑿梁納楹亦已拙楮墨長垂正無術晟不見武梁石室畫像今且殘還汝此冊爲之三喟然

次昌黎符讀書城南韻示同兒

至聖孔尼父亞聖孟子輿兩家無父兒自解勤讀書惟其勤讀書道德塞太虛儻恃腰脚健逸蕩成童初夏楚雖丈二焉能及里閭當時兩聖母哭死亦無如爾今旣有爺祝爾同祭魚食肉又頓頓衣絺又疏疏炎天何修修夏屋何渠渠不學復何事人頑豈誠豬爾母生爾來

寶於月中蜍不肯就外傳恐為人所蛆車旁一卷經紡
讀同起居爾年十四五此意不念歟古人書滿腹強半
作客儲謂奪爾毋憂出游勤有餘豈料心益放狂童狂
也且家裏念子季瓜蔬含淚鉏焉知正逸樂驕若立耳
驢老農不耕耨任詡三歲畚騏驎不舉足終年守階除
聰明且如此愚也而裾裾男兒要自憤朋友空面譽學
問大如川眾流會歸墟老陶就衰矣嬾情隨阿舒信如
子不子有粟吾食諸木石諒非爾捫心自躊躇

寄山中兄弟五首

門祚嗟衰薄書來又鼓盆驚心仍坼醵何趣要兒孫弱

息原依孀新人已入門徒令千里眼蹙額望乾坤

璣

可少阿奴得晨昏且在前看今吾亦愧念昔毋淡憐辛

苦埋兒鋪蕭條賣藥錢早應儲竹木同去午山邊

珏

似昔愁還少而今別又多與君皆老矣前路復如何著

述懷猶壯聰明歎已過仍賢桂岡上花草共婆娑

伯容

見爾書來說蝦川待省爺兩親俱在彼五子得皆家到

日舅如問言余鬢已華後生猶若此南望一長嗟

兆熙

已脫三升服堪愁六尺孤每思吾舅喪直是寸心無活

計書中粟當年掌上珠相看俱不小此意可銘孟

庶齋庶齋

丙弟

中秋後夕獨酌紫薇下

銀河轉碧星漸稀
庭中露上清氣肥
朙月遲遲漸下樹
涼風嫋嫋還吹衣
提壺對此獨自勸
伴座無語三紅薇
學舍如舟地如水
菱荇蕩漾相因依
忽驚溪夜落何處
美人散盡吾何歸
仰看天宇淨塵翳
俯念人閒多是非
心魂月魄兩朙妙
官官人天俱入機
六根長願止如此
酌月一盃無我違

九日攜兒與諸生渡江飲車砦載酒閣閣無名
余名之

巨閣崢嶸突跨空
天教泥爪印飛鴻
有緣風日歸盃底

無限江山在眼中他日世談王口勝重陽會有七人同
不應載酒堂邊路止屬當年玉局翁

吳生招偕同人游東邨飲其妹氏家邨在諸葛
洞後

諸君誠喜余不惜導幽聘渡江行十里果造遠人境茲
邨信溪僻水裹山以亘占田僅七戶居人無數姓蔓老
甘薯荒雨餘薺薑淨橘柚青黃閒時立美人靚秋梨驚
尙花節候訝非應入竹縱緩步觀松得吾性驚禽時一
鳴薄日漾虛映吳生故好事置具累親倩大巢煮新尖
脆筍掘早迸半歲羨罨法味果生韻勝事事愜所尙爲

子一醉竟幾見迂廣文魚鳥能送迎酣歌謝林谷斯游
準難更後日君等來尙憶谷口鄭

攜諸生游卧龍岡飲抱膝亭

虛亭擅高勝登覽及友生初冬似春晚蜂喧紅樹晴憑
欄一尊酒嘯傲凌霄崢仰攀卑飛山俯瞰諸葛營榕樹
藏萬家蒼蒼浮市聲青林暗王口白塔明孤撐三江盡
朝東貨轉無諸城咽喉導黔粵管鑰通梁荆雄都盡體
勢聖服前人精綬懷百餘年穆然見高清何時卧龍公
於茲靖蠻氓威德泉在地誰曾覩親征抱膝獨長謠因
見千古情

論詩示諸生時代者將至

我誠不能詩而頗知詩意言必是我言字是古人字固
宜多讀書尤貴養其氣氣正斯有我學贍乃相濟李杜
與王孟才分各有似羊質而虎皮雖巧肖仍僞從來立
言人絕非隨俗士君看入品花枝幹必先異又看蜂釀
蜜萬蕊同一味文質誠彬彬作詩固餘事人才古難得
自惜勿中弄我衰復多病骯髒不宜世歸去異山川何
時見君輩念至思我言有得且常寄

子何自黎平相從古州余西歸有日子何以事
先還送之

美言出貧士孔孟不值錢躋跼而官材見者皆曰賢世
道止如此志人誠可憐簞瓢苟奇物性命豈易捐汝文
既虎脊汝相又鳶肩還家更簡練秋律期明年士不附
青雲感到太史遷相勉非利祿尙思汝墳篇

贈劉生子瑩

之琇

生布衣業燭籠為活

華亭蕭木匠富水李衣工詩並傳當世生今繼此風窮
居臨糞巷秀句出鐙籠吾道無紳布懷哉五字功

巢經巢詩集卷第七